



ヲ 7
2859
10



門 71
號 2859
卷 10

歲時廣記卷第三十六

廣寒仙裔陳元靚編

重九下

獵沙苑

廣德神異錄天寶十三年重陽日元宗獵于沙苑時雲間有孤鶴回翔元宗親御弧矢一發而中其鶴帶箭徐墜將及地丈許歘然矯翼由西南飛逝萬眾極目良久乃滅先是益州城西有明月觀松桂深寂非修習精確者莫得而居觀

昭和十八年
七月二十二日
購求

之東廊第一院尤爲幽絕每有自稱青城道士徐佐卿者一歲率三四至風局清古甚爲道流之所傾仰忽一日自外至神采不怡謂院中人曰吾行山中偶爲飛矢所加尋已無恙矣然此箭非人間所有吾當留之壁間後年箭主到此卽宜付之慎無墜失仍援毫記壁云留箭之時則十三載九月九日也後元宗避亂幸蜀暇日命駕行遊偶至斯觀樂其佳境因遍諸院旣入斯堂忽覩挂箭命侍臣取而玩之蓋御箭也上

深異之因詢觀之道士具以實對卽視佐卿所題乃前歲沙苑縱畋之日佐卿卽中箭孤鶴爾當日蓋自沙苑翻飛而至於此元宗大奇之因收其箭而寶焉自後蜀人無復有遇佐卿者東坡作赤壁賦指道士爲孤鶴豈非暗用此事乎

授天冊

漢天師家傳真人張道陵於桓帝永壽元年領弟子王長趙昇往雲臺治築壇安爐復鍊大丹丹成服之浴於水有神光二年九月九日在巴

西赤城渠亭山中太上遣使者持玉冊授正一
真人之號因謂長昇曰吾有丹在煉丹亭上金
盂中汝二子可分餌今日當隨吾矣是日停午
之際復見一人朱衣青襟曳履持版一人黑幘
綃衣結履佩劍各捧玉函從朱衣使者趨前再
拜曰奉上清真符追真人於閻苑須臾東北二
十四人皆龍虎鸞鶴之騎各執青幢絳節獅子
辟邪天騶甲卒皆至稱景陽吏卽有黑龍駕一
紫輦玉女二人引真人與夫人雍氏登車前導

後從天樂隱隱迎至一處瓊樓玉閣闕上金牌
玉字曰太玄都省正一真人闕真人與夫人同
入昇于寶臺萬神趨賀羣仙頂謁唐肅宗御贊
曰德自清虛聖教之實或隱或見是樸是質靖
處瓊堂焚香玉室道心不二是爲正一

鍊金丹

女仙錄孫夫人三天法師張道陵妻也同隱龍
虎山修三元默朝之道積年累有感降天師得
黃帝龍虎中丹之術丹成能服之分形散景坐

在立亡天師自鄱陽入嵩高山得隱世制命之術能策召鬼神時海內紛擾在位多危又大道凋喪不足以拯危佐世年五十方修道及丹成又二十年術用精妙遂入蜀遊名山率身行教夫人栖真江表道化甚行以永嘉元年到蜀居陽平治鍊金液還丹依太一元君所授黃帝之法積年丹成變形飛化無所不能以桓帝永壽二年丙申九月九日與天師於閬中雲臺山白日昇天位於上真

開花神

續仙傳殷七七名文祥又名道笏不知何許人也遊行天下人久見之然莫測其壽多醉於城市間周寶舊於長安識之尋爲涇原節度延遇禮重及寶移鎮浙西數年後七七忽到寶召之師敬益甚每自歌曰琴彈碧玉調藥鍊白朱砂解醞頃刻酒能開非時花寶嘗試之悉有驗鶴林寺有杜鵑花寺僧相傳云貞元中有外國僧自天台鉢盂中以其根來種之每至春末盛開

或窺見三女子紅裳艷麗往來花下人有摘者必爲所崇俗傳女子花神也花之繁盛異於常花其花欲開報探分數節使賓僚官屬繼日賞玩其後一城士女無不酒樂遊從寶一日謂七七日鶴林之花天下奇絕常聞能開非時之花今重九將近能副此日乎七七曰可也乃前二日往鶴林焉中夜女子來謂七七曰道者欲開此花耶妾爲上元所命下司此花然此花在人間已逾百年非久當歸閬苑今特與道者共開

之來日晨起寺僧忽訝花漸折蘂及九日爛漫如春乃以聞寶與一城士庶驚異之遊賞復如春間數日花俄不見後兵火焚寺樹失根株信歸閬苑矣東坡守錢塘觀菩提寺南漪堂杜鵑詩云南漪杜鵑天下無披香殿上紅氍毹鶴林兵火真一夢不歸閬苑歸西湖又和述古冬日牡丹詩云當時只道鶴林仙能遣秋花發杜鵑誰信詩能回造化直教霜旛放春妍又云安得道人殷七七不論時節遣開花

遇仙方

列仙傳唐蜀中酒閣一日有道人過飲童顏漆髮眉宇疎秀酒酣攄扇自歌歌曰尾閭不禁滄溟竭九轉神丹都漫說惟有斑龍頂上珠能補玉堂關下穴時隣坐有許仲源者見之顧其儔曰此非塵俗人也乃起致敬願解所歌之意道人曰今日未當說汝必欲知此可於重九日丈人觀相尋許因移席與飲未終而先去許至日絕早往觀中而道人先已在焉乃探懷中一短

卷授許曰此返老還童之術也吾餌此藥今壽四百二十三矣緣汝宿骨有分加之至懇故以相授若能以陰功成就之卽當仙矣言訖化白鶴飛去許乃再拜受歸煉服不怠歲數百而有少容行及奔馬力兼數人後入青城山遂不復見弟子有得其術者因以傳人其歌曰尾閭不禁滄溟竭者謂尾閭乃東海泄水穴也人身泄氣之所亦名尾閭若此不禁滄溟可竭矣九轉神丹都漫說者謂龍虎鉛汞陰陽日月黃芽白

雪嬰兒姪女皆不歸一也惟有斑龍頂上珠能
補玉堂關下穴者謂取鹿角一雙每三寸長截
之東流河水浸刷去土每斤入楮實子一兩黃
蠟桑白皮各二兩盛以金石之器慢火煮三日
三夜外用一器貯熱水旋添候數日足取出削
去黑皮服之

夢暑藥

夷堅甲志虞井甫紹興二十八年自渠州守召
至行在憇北郭外接待院因道中冒暑得疾泄

痢連月重九日夢至一處類神仙居一人被服
如仙官延之坐視壁間有韻語一方讀之數過
其詞曰暑毒在脾濕氣連腳不泄則痢不痢則
瘡獨煉雄黃烝麩和藥甘草作湯服之安樂別
作治療方家之錯夢回尙能記卽錄之蓋治暑
泄方如方服之遂愈

辟邪惡

異苑庾紹之與宗協爲中表之親桓元時紹之
爲湘水太守病亡後協遇重九日政飲茱萸酒

次俄一小兒通云庾太守請見須臾紹之忽至
協與坐叙闊因問以鬼神生死之事頃之求飲
協以酒飲之紹之執杯便置遽曰酒有茱萸氣
倏爾不見審是則茱萸辟邪惡可知矣

借書籍

續搜神記有一書生居吳自稱胡博士以經傳
教授假借諸經書涉數載忽不復見後九月九
日人相與登山遊觀但聞講誦之聲尋覓有一
空塚入數步羣狸羅坐見人迸走唯有一狸獨

不能去乃是常假書者

置藥市

四川記唐王昌遇梓州人得道號元子大中十
三年九月九日上昇自是以來天下貨藥輩皆
於九月初集梓州城八日夜於州院街易元龍
池中貨其所賣之藥川俗因謂之藥市遞明而
散逮國朝天聖中燕龍圖肅知郡事又展爲
三日至十一日而罷藥市之起自唐王昌遇始
也

吸藥氣

四川記成都九月九日爲藥市詰旦盡一川所
出藥草異物與道人畢集帥守置酒行市以樂
之別設酒以犒道人是日早士人盡入市中相
傳以爲吸藥氣愈疾令人康寧是日雨云有仙
人在其中張仲殊作望江南以詠之曰成都好
藥市晏遊閒步出五門鳴劍佩別登三島看神
仙縹緲結靈烟雲影裡歌吹暖霜天何用菊花
浮玉醴願求朱草化金丹一粒定長年

請證明

夷堅志池州貴池縣有妙因寺僧子深主之壯
歲遊方參請步歷不倦而饌飲之間不擇葷素
皆以爲泛常流耳乾道九年九月九日所善柯
伯詹過之留飲數杯將徹忽語詹曰子今日爲
我證明詹曰聞師此說久矣只恐未必了得僧
作色言吾今撒手便行不比常時子盍少駐卽
入寮中使童行鳴鼓集衆已而端坐索筆書曰
衲僧日日是好日要行便行毋固必虛空天子

夜行船摩訶般若波羅密擲筆而化

作齋會

東京夢華錄京都諸禪寺九日各有齋會惟開寶寺仁王院有獅子會諸僧皆坐獅子上作法事講說

煉陽炁

歲時雜記九者老陽之數九月九日謂之重陽道家謂老君九月九日生取諸此也仙人道士所以銷陰鍊陽為君子當法此以自強不息何

暇登山肆飲耶

消陽厄

仙書茱萸為辟邪翁菊花延壽假此二物以消陽九之厄

種罌粟

提要錄重九日宜種罌粟早午晚三時種開花三品按本草名罌粟子味甘平無毒主丹石發動不下食者和竹瀝煮作粥食之極美一名象穀一名米囊一名御米花圖經云種之甚難圃

人隔年糞地九月布子涉冬至春始生苗極繁
茂矣不爾種之多不出亦不茂俟其餅焦黃則
採之衍義曰研末以水煎仍加蜜爲罌粟湯服
石人甚宜飲之

收枸杞

四時纂要云重九日收枸杞浸酒飲不老不白
去一切風淮南枕中記著西河女子服枸杞法
云正月上寅採根二月上卯治服之三月上辰
採莖四月上巳治服之五月上旬採葉六月上

未治服之七月上申採花八月上酉治服之九
月上戌採子十月上亥治服之十一月上子採
根十二月上丑治服之又有并花實根莖作煎
及單榨子汁煎膏服之其功並等輕身益壽

養白鷄

墓書養白鷄令識其主聲形以五月五日九月
九日任意用五色綵長五寸係鷄頸將鷄于名
山放鷄著山仰頭呪曰必存鳴晨雞心開悟

餒肥鷄

集正歷九月九日採茱萸子餒鷄令肥

必里遲

燕北雜記戎主九月九日打團斗射虎少者輸
重九一筵席射罷于高地處卓帳與番臣漢臣
登高飲菊花酒兔肝切生以鹿舌醬拌食之番
呼此節為必里遲離漢人譯云九月九日也

歲時廣記卷第三十六

歲時廣記卷第三十七

廣寒仙裔陳元靚云今編

小春

禮記月令曰孟冬之月律中應鐘注云陰應
於陽轉成其功是月也坤卦上六純陰用事
將生少陽又初學記云冬月之陽萬物歸之
以其温煖如春故謂之小春亦云小陽春

賜錦段

皇朝歲時雜記十月朔京師將校禁衛以上並

賜錦袍皆服之以謝三日近侍宗室侯伯預賜者但賜錦段以將公服領袖若尙褻之製或戲曰看看將相近侍總去鏡匣裡伸出頭來也邊方大帥都漕正任侯皆賜錦袍舊河北陝西河東轉運使副無此賜 祖宗朝有人自陳乃賜衣襖諸軍將校皆賜錦袍

賜錦袍

續翰林志李昉赴玉堂賜宴詩後序云今日之盛其事有七新賜衣帶鞍馬十月朔錦袍特定草麻例物改賜內庫法酒俸給見錢給親事官隨從就院勅設

賜冬襖

楊文公談苑 國朝之制文武官諸軍校在京者十月旦皆賜衣服其在外者賜中冬衣襖又錢惟演金坡遺事載舊規云十月初別賜長襖子國初以來賜翠毛錦 太宗改賜黃盤雕

賜季衣

皇朝歲時雜記十月朔百官自陞朝以上皆賜

夾公服衣著將士亦是日賜夾袍將校禁旅亦皆及唯宗室甚厚謂之四季衣春冬端五十月一日也

賜時服

澠水燕談陞朝官每歲初冬賜時服止于單袍太祖訝方冬猶賜單衣命錫以袂服自是士大夫公服冬則用袂

賜茶酒

皇朝歲時雜記朝堂諸位自十月朔設火每起

居退賜茶酒盡正月終每遇大寒陰雪就漏舍

賜酒肉

進爐炭

東京夢華錄十月朔有司進煖爐炭民間皆置酒作煖爐會又呂原明歲時雜記京人十月朔沃酒及炙臠肉於爐中圍坐飲啗謂之煖爐

開火禁

皇朝歲時雜記大內火禁甚嚴自十月朔許置火盡正月終近歲多春寒常特展火禁五日亦

不過展

朝陵寢

東京夢華錄十月朔都城士庶皆出城饗墳禁中車馬出道者院及西京朝陵宗室車馬亦如寒食節城市內外已於九月下旬賣冥衣靴鞋席帽衣段以備此朔燒獻

拜墓瑩

河南程氏遺書拜墳則十月一日拜之感霜露也寒食節又從常禮祭之飲食則稱家有無

修齋會

歲時雜記十月朔在京僧寺以薪炭出於檀施是日必開爐上堂作齋會

食黍臠

太清草木方十月一日宜食麻豆鑽荆楚歲時記云人皆食黍臠則炊乾飯以麻豆羹沃之鑽卽黍臠也

上餽餽

盧公範饋餉儀十月一日上蕎麥野雞餽餽

作焦糖

唐雜錄十月一日夔俗作蒸裹焦糖為節物杜甫十月一日詩云蒸裹如干室焦糖幸一料與料

同盤

送縑綿

歲時記十月朔人家送親黨薪炭酒肉縑綿新嫁女送火爐

占麻麥

四時纂要十月朔日風雨者早夏水麻子貴十

倍二日雨貴五倍一云來年麥善晦日同占

卜米穀

四時纂要十月朔日風從東來糴賤從西來春貴朔日風寒正月米貴大雨大貴小雨小貴

崇道教

正一旨要十月一日道家謂之民歲臘五帝校定生人錄料官爵壽算疾病輕重其日可謝罪請添算壽祭祀先沐浴于玄祖慎勿多食淫昏醉睡可念善禮拜

請福壽

道書十月一日爲成物之日東皇大帝生辰五方五帝奏會之日宜祈福請算

獲仙藥

原化記大歷初鍾陵客崔希真家於郡西善鼓瑟工繪事好修養之術嘗十月朔大雪晨出見一老父蓑笠避雪門下希真異之請入旣去蓑笠見其神色毛骨知爲非常人也益敬之遂獻湯餅及松花酒老父曰花酒無味野人有物能

令其醇美乃於懷中取藥一丸黃色而堅以石扣置酒中頓見甘美復以數丸相遺請問老父笑而不答希真入宅于窻隙窺之見老父於幄前畫素上如有所圖俄忽失之希真視幄中得圖焉有三人二樹一白鹿一藥笈筆勢清絕似非意所及希真後將圖并藥詣茅山李涵光天師曰此真人葛洪第三子所畫其藥乃千歲松膠也

下元

道經曰十月十五日謂之下元令節是日宜齋戒沐浴靜慮澄心酌水獻花朝真禮聖可以滅罪消愆延年益壽

宜崇福

正一旨要下元日九江水帝十二河源溪谷大神與賜谷神水府靈官同下人間校定生人罪福又下元三品解厄水官主錄百司檢察人間善惡上詣天闕進呈大宜崇福

罷觀燈

皇朝歲時雜記 開寶元年詔中元張燈三夜唯正門不設燈 上御寬仁樓卽今東華門也 太平興國四年設下元燈依中元例張燈三夜 淳化元年詔罷中元下元觀燈

上靈廟

干寶搜神記漢代十月十五日宮中故事以豚酒上靈女廟吹埴擊筑奏上弦之曲連臂踏歌赤鳳來之曲乃巫俗也

昇仙天

列仙傳十月十五日衡嶽何真人昇仙日又神
烈真君同弟子四人飛昇日又普慧鍾離真人
飛昇日又王真人尸解日

戴粹時

燕北雜記十月內五京進紙造小衣甲并鎗刀
器械各一萬副十五日一時堆垛戎主與押番
臣寮望木葉山奠酒拜用番字書狀一紙同焚
燒口木葉山神云寄庫番呼此爲戴粹漢人譯
云戴是燒粹是甲

歲時廣記卷第三十七

歲時廣記卷第三十八

廣寒僊裔陳

元靚

編

冬至

通歷及高氏小史曰地皇氏以十一月為冬至
 至歷義疏云冬至十一月之中氣也言冬至
 者極也太陰之氣上干於陽太陽之氣下極
 於地寒氣已極故曰冬至氣當易之是以王
 者閉門闔商旅不行以其陽氣乘踊君壽益
 長是以冬賀也亦以日之行天至於巽維東



南角極之於此故曰冬至

一陽生

易復卦疏陽氣始于剥盡之後至陽氣復時凡經七日如褚氏莊氏並云五月一陰生十一月一陽生凡七日而云七日不云月者欲見陽長須速故變月言日易通卦驗云冬至一陽生配乾之初九

七曜會

漢書宦者淳于陵渠復太初歷晦朔弦望最密

日月如合璧五星如連珠注云謂太初上元甲子夜半朔旦冬至時七曜皆會牽牛分度又桓譚新論云從天元已來訖十月朔朝冬至日月如連璧

昴星見

尚書曰短星昴以正仲冬孔安國注云日短冬至之日也昴曰武中星亦以七星並正冬至三節也傅亮冬至詩云昴星殷仲冬短晷窮南極辰星升

春秋考異郵曰日冬至辰星升

陰氣竭

淮南志天文訓曰冬至則斗北中繩陰氣竭陽氣萌故曰冬至爲德萬物閉藏蟄蟲首穴

陽氣萌

後漢陳寵奏冬至之日陽氣始萌故有芸荔之應月令曰芸始生荔挺出注云芸香荔馬薤是也宋傅亮冬至詩云柔荔迎時萋芳芸應節馥

南極長

左傳冬至日南極景極長陰陽日月萬物之始律當黃鍾其管最長故有履長之賀杜甫詩冬至至後日初長

晝漏短

月令章句冬至日有三極晝漏極短去北極遠晷景極長

黃鍾通

漢律歷志天子以冬至合八能之士陳八音聽樂均度晷景候鍾律權土炭定陰陽冬至陽氣

應則樂均清景長極黃鍾通土炭輕而衡仰

君道長

漢雜事冬至陽氣起君道長故賀夏至陰氣起君道衰故不賀

元明天

呂氏春秋冬至日行遠道周四極命之曰元明天

廣漠風

易緯冬至則廣漠風至蕭愨詩云漠風吹竹起

會章月

前漢律歷志參天九兩地十是謂會數參天數二十五兩地數二十是為朔望之會曰會數乘之則周于朔旦冬至是為月會以五位乘會數而朔日冬至是為月章

建子月

玉燭寶典十一月建子周之正月也老杜詩云荒村建子月王昌齡詩云駕幸溫泉日嚴霜子月初

得天統

史記封禪書黃帝得寶鼎神策是歲巳酉朔旦冬至得天之統於是黃帝迎日推策後率二十餘歲後復朔日冬至

通歷法

桓譚新論通歷數家算法推考其紀從上古天元以來訖十一月甲子夜半朔冬至

觀日影

周禮冬至日在牽牛影長一丈三尺夏至日在

東井影長一尺有五寸

迎日至

易通卦驗冬至始人主與羣臣左右從樂五日天下亦家家從樂五日以迎日至之禮鄭玄注云從者就也冬至君臣俱就大司樂之官臨其肄樂祭天圜邱之樂以爲祭祀莫大於此

書雲物

左傳僖公五年正月辛亥朔日南至公既視朔遂登觀臺以望而書禮也凡分至啟閉必書雲

物爲備故也注云至謂冬夏至也

觀雲色

周禮保章氏以五雲之物辨吉凶注云鄭司農以二至二分觀雲五色青爲蟲白爲喪赤爲兵荒黑爲水黃爲豐

祭皇天

晉禮志十二月冬至始祀皇天上帝于圜邱以始祖有虞舜帝配

祭昊天

隋禮儀志冬至之夜陽氣起於甲子既祭昊天宜在冬至自是冬至祀天

祀上帝

唐禮樂志冬至祀昊天上帝于圜邱以高祖神堯皇帝配

祀五帝

禮記月令祀昊天上帝於圜邱注云冬至日祀五帝方及日月星辰禮於壇

成天文

易通卦驗冬至成天文鄭玄注云天文謂三光
運行照天下冬至而數訖于是時也祭而成之
所以報也

朝聖祖

嘉泰事類儀制令諸州 聖祖殿冬至節州長
吏率在城官朝謁

同正禮

唐禮樂志皇帝冬至受羣臣朝賀其日將士填
諸街勒所部列黃麾大仗屯門及陳於殿庭皇

帝服通天冠紗絳袍戶部禮部陳貢物並同元
正賀禮惟冬至不奏祥瑞

排冬仗

皇朝歲時雜記冬至 天子受朝賀俗謂之排
冬仗百官皆衣朝服如大禮祭祀凡燕饗而朝
服唯冬至正會爲然詳見元日排正仗

用雅樂

國朝事始 乾德四年詔太常寺大朝會復用
二舞先是晉天福末戎虜亂華中朝多事遂廢

卷三十八
七
之至是始復是歲冬至 御乾元殿始用雅樂
登歌

奉賀表

嘉泰事類儀制令冬至發運監司官諸州長吏
奉表賀舊制遣使者如舊例詳見元日

如元旦

四人月令冬至之日荐黍羔先荐玄冥以及祖
禩其進酒尊老及謁賀君師耆老一如正旦

亞歲朝

宋書魏晉冬至日受萬國及百寮稱賀因小會
其儀亞於歲朝曹植冬至表云亞歲迎祥履長
納慶

若年節

東京夢華錄京師最重冬至節雖至貧者一年
之間積累假借至此日更易新衣備辦飲食享
祀先祖官放關撲慶賀往來一如年節

號冬除

歲時雜記冬至既號亞歲俗人遂以冬至前之

夜爲冬除大率多做歲除故事而差畧焉提要錄謂之二除夜

爲大節

歲時雜記都城以寒食冬正爲三大節自寒食至冬至中無節序故人間多相問遣至獻節或財力不及故諺語云肥冬瘦年

盡九數

歲時雜記鄙俗自冬至之次日數九凡九九八十一日里巷多作九九詞又云九盡寒盡伏盡

熱盡子由冬至詩云似聞錢重柴炭輕今年九九不難數九九詞乃望江南今行在修文巷有印本言語鄙俚不錄

添紅線

歲時記晉魏間宮中以紅線量日影冬至後日添長一線杜甫至日遣興云愁日愁隨一線長古詞云奈愁又愁無避處愁隨一線口長東坡詩云更積微陽一線功子由冬日卽事云寒日初加一線長臘醅添浸隔羅光

增繡功

唐雜錄言宮中以女功揆日之長短冬至後日
晷漸長比常日增一線之功山谷詩云宮線添
尺餘藝苑雌黃云一線之說以杜甫小至詩考
之刺繡五紋添弱線吹葭六琯動浮灰當以唐
雜錄說爲是故柳耆卿有繡工日永之詞宋京
有日約繡綳長一線之句

進履鞮

宋書冬至朝賀享祀皆如元日之儀又進履鞮
魏國曹植冬至獻襪頌表云伏見舊儀國家冬
至獻履襪所以迎福踐長又酉陽雜俎云北朝
婦人常以冬至進履襪又韡後魏北京司徒崔
浩女儀近古婦人常以冬至進履襪于舅姑崔
駟襪銘曰建子之月助養元氣

戴陽巾

雲仙散錄載金門歲節曰洛陽人家冬至煎餲
綠珠戴一陽巾

玩冰筋

天寶遺事冬至日大雪霽因寒所結簷溜皆冰

條妃子使侍兒敲二條看玩帝自晚朝視政廻
問妃子曰所玩何物邪妃子笑而答曰妾玩水
筋也帝曰妃子聰慧比象可愛

貢煖犀

開元遺事開元二年冬至交趾國進犀一株色
如黃金使者請以金盤置殿中温温有煖氣襲
人上問其故使者對曰此辟寒犀也頃自隋文
帝時曾進一株直至今日上甚悅前輩詩曰辟
寒犀外凍雲平

得特支

皇朝歲時雜記在京諸軍每年冬至得大特支
唯南郊年既有賚則更無特支若改作明堂裕
皆同則既依郊賚冬至又例有特支

休假務

嘉泰事類假甯格冬至假五日又假寧令諸假
皆休務

寢兵鼓

五禮通義冬至所以寢兵鼓商旅不行君不聽

政事

住軍教

嘉泰事類軍防格冬至諸軍住教三日

泣囚獄

後漢盛吉為廷尉每冬至節獄囚當斷妻夜秉燭吉持丹筆夫妻相對垂泣東坡庭事蕭然三圍皆空和前篇云執筆對之泣哀此繫中囚

祝諸子

晉周顛傳顛母李氏字絡秀生顛及嵩謨元帝

時並列顯位常冬至絡秀舉觴賜三子曰爾等並貴列吾復何憂嵩曰恐不如尊旨顛志大才短名重識暗非自全之道嵩性直不容於世唯阿奴碌碌常在母目下阿奴謨小字也後皆如其言

候赦法

風角書候赦法冬至後盡丁巳之日有風從已上來滿三日以上必有大赦

驗災旱

易通卦驗冬至之日見雲送迎從下嚮來歲大美人民和不疾疫無雲送迎德薄歲惡故其雲赤者旱黑者水白者兵黃者有土功諸從日氣送迎其徵也

卜壬日

清臺占法冬至後一日得壬災旱千里二日得壬小旱三日得壬平常四日得壬五穀豐熟五日得壬小水六日得壬大水七日得壬河決八日得壬海翻九日得壬禾麥大熟十日得壬五

穀不成

占人食

四時纂要云以冬至日數至正月上旬日滿五十日人食長一日即餘一月食少一日即少一月食也此最有據

避賊風

黃帝針灸經冬至之日風從南來者為虛賊傷人也

別寢處

庚申論是月陰陽爭至前後各五日宜別寢

食餛飩

歲時雜記京師人家冬至多食餛飩故有冬餛飩年餘餛飩之說又云新節已故皮鞋底破大捏餛飩一口一箇

十日人食作豆粥

荆楚歲時記共工氏有不才之子以冬至死爲疫鬼畏赤小豆故冬至日作赤豆粥以禳之屏山先生至日詩云豆糜厭勝憐荆俗雲物書祥

憶魯臺

試穀種

崔實種穀法以冬至日平勻五穀各一升布囊盛北墻陰下埋之冬至後十五日發取平均最多者歲宜之一云五十日

澆海棠

博聞錄冬至日早糟水澆海棠花根其花分外鮮明

奠黑山

燕北雜記戎人冬至日殺白馬白羊白雁各取其生血代酒戎主北望拜黑山奠祭山神言契丹死魂爲黑山神所管又彼人傳云凡死人悉屬此山神嘉泰事類彙錄云虜中黑山如中國之岱宗云虜人死魂皆歸此每歲五京進人馬紙各萬餘事祭山焚之其禮甚嚴非祭不敢近山

歲時廣記卷第三十八

歲時廣記卷第三十九

廣寒僊裔陳

元覲

編

臘日

許慎說文曰冬至後三戌爲臘廣雅曰夏曰嘉平商曰清祀周曰大蜡秦初曰臘已而爲嘉平祭部云漢改爲臘臘者獵也因取獸以祭也玉燭寶典云臘者祭先祖蜡者報百神同日異祭也高堂除魏臺訪議曰何以用臘聞先師曰帝王各以其行之盛而祖以其終

而臘水始於申盛於子終於辰故水行之君以子祖辰臘火始於寅盛於午終於戌故火行之君以午祖戌臘木始於亥盛於卯終於未故木行之君以卯祖未臘金始於巳盛於酉終於丑故金行之君以酉祖丑臘土始於未盛於戌終於辰故土行之君以戌祖辰臘故漢火德以戌爲臘魏土德以辰爲臘晉金德以丑爲臘謹按國朝事始云 建隆四年太常博士和峴奏唐以前寅日蜡百神卯日

祭社宮辰日臘享宗廟開元定禮三祭皆于臘辰以應土德 聖朝火德合以戌月爲臘而以前七日辛卯便行蜡禮恐未爲宜下太常議而請蜡百神祀社稷享宗廟同用戌臘日

秦初臘

史記本紀秦惠文君十二年初臘

秦改臘

洞仙傳茅濛字初成華陽人也師鬼谷先生受

長生之術後入華山靜齋絕塵修道合藥乘雲
駕龍白日升天先是其邑歌謠曰神仙得者茅
初成駕龍上昇入太清時下元洲戲赤城繼世
而往在我嬴帝若學之臘嘉平始皇聞之因改
臘曰嘉平欣然有尋仙志

漢祠社

漢書高祖十年春有司奏令縣道常以春二月
及臘祠社稷以彘羊

晉作樂

晉起居注安帝隆安四年十二月辛丑臘祠作
樂

魏時祭

魏臺訪議薦田獵所得禽獸謂之臘特時祭之
名爾亦伊耆氏之蜡也始臘蜡本一

隋定令

隋禮儀志隋初因周制定令亦以孟冬下亥蜡
百神臘宗廟開皇四年十一月詔曰古稱臘者
接也取新故交接前周歲首今之仲冬建冬之

月稱蜡可也後周用夏后之時行姬氏之蜡考諸先代於義有違其十月行蜡者停可以十二月爲臘

唐用周

唐書則天初載二年臘月己未始用周臘

莽改法

後漢書沛國陳咸爲廷尉監王莽篡位還家杜門不出莽改易漢法令及臘日咸言我先祖何知王氏臘也

賜御宴

提要錄唐制臘日賜宴及賜口脂面藥以翠管銀罌盛之杜甫臘日詩云縱酒欲謀良夜醉還家初散紫宸朝口脂面藥隨恩澤翠管銀罌下九霄

賜御食

景龍文館記三年臘日帝於苑中召近臣賜臘晚自北門入於內殿賜食加口脂紅雪澡豆等又云賜口脂臘脂盛以碧縷牙笏

賜甲煎

皇朝歲時記臘日 國朝舊不賜口脂面藥熙
寧初始賜二府以大白金奩二小陶罌口脂甲
煎各一并奩賜之

賜牙香

韓渥傳臘日賜銀合子駐顏膏牙香等綉香囊
一枚

獻口脂

唐百官志中尚署臘日獻口脂

賜御宴

提要錄唐制臘日賜宴及賜口脂面藥以翠管
銀罌盛之杜甫臘日詩云縱酒欲謀良夜醉還
家初散紫宸朝口脂面藥隨恩澤翠管銀罌下
九霄

賜御食

景龍文館記三年臘日帝於苑中召近臣賜臘
晚自北門入於內殿賜食加口脂紅雪澡豆等
又云賜口脂臘脂盛以碧縷牙篋

賜甲煎

皇朝歲時記臘日 國朝舊不賜口脂面藥熙
寧初始賜二府以大白金奩二小陶罌口脂甲
煎各一并奩賜之

賜牙香

韓渥傳臘日賜銀合子駐顏膏牙香等綉香囊
一枚

獻口脂

唐百官志中尚署臘日獻口脂

進香囊

唐六典中尚署臘日進衣香囊

製官藥

皇朝歲時記臘日政府以供堂錢製藥分送諸
廳其後多分送藥材如牛黃丹砂龍腦金銀箔
之類張杲卿執政日獨以為傷廉不受開封府
及舊三司則集眾錢合和均分他官入錢皆得
之外郡亦然

授仙藥

神仙傳尹軌晉太康元年臘日過洛陽授主人
以神仙藥

送風藥

歲時雜記醫工以臘月獻藥以風藥爲主亦有
獻口脂面藥及屠蘇者

治諸藥

歲時雜記凡治合圓劑必用臘月乃經夏不損
如牛胆釀天南星之類皆用臘月

上頭膏

太平御覽盧公家範凡臘日上澡豆及頭膏面
脂

釀冬酒

泗人月令十月上辛命典饋漬麴釀冬酒以供
臘日祭祀

造花餠

金門歲節洛陽人家臘日造脂花餠

得菟髓

風俗通菟髓俗說臘正旦食得菟髓者名之曰

幸賞以寒酒幸者善祥令人吉利也

薰豕肉

歲時雜記臘日以豕肉先糟熟掛灶側至寒食
取食之楊誠齋詩曰老夫病暑飯不能先生饋
肉香滿城霜刀削下黃水精月斧斫出紅松明
君家猪胆臘前作是時雪沒吳山腳公子彭生
初解縛糟邱挽上凌烟閣試將一臠配雙螯人
間信有揚州鶴

蓄猪脂

歲時雜記臘日猪脂蓄之瓦罐終歲爲啗馬之
用提要錄云亦可治牛疥癩

取兔頭

博濟方治產難滑胎臘月兔頭腦髓一箇攤於
紙上令勻候乾剪作符子於面上書生字一箇
覺母陣痛時用產母釵股夾定燈焰上燒灰蓋
盛煎丁香酒調下又勝金方專治發腦後背及
癰疽熱癩惡瘡等臘月兔頭細剉入瓶內密封
愈久愈佳塗帛上厚封熱痛處如水頻換差又

卷三十九
抱樸子曰兔壽千歲五百歲毛色變白又云兔血和女丹服之有神女二人來侍可役使之

乾兔髓

經驗方催生丹兔頭二箇臘月內取頭中髓塗放淨紙上令風吹乾入通明乳香二兩碎入前乾兔髓同研來日是臘今日先研就夜星宿下安桌子上時果香茶同一處排定須是潔淨齋戒焚香望北帝拜告大道弟子某修合救世上難產婦人藥願威靈祐助此藥速令生產禱告

再拜用紙帖同露之次燒香至來日日未出時以猪肉和丸如鷄頭子大用紙袋盛貯透風處懸掛每服一丸醋湯下良久未產更用冷酒下一丸卽產此神仙方絕驗

掛牛膽

圖經本草世多用風化石灰合百草團末治金瘡殊勝今醫家或以臘月黃牛膽搗和卻內膽中掛之當風百日研之更勝草葉者臘月者尤佳

收狐膽

續傳信方臘月收雄狐膽若有人卒暴亡未移時者溫水微研灌入喉即活常須預備救人移時即無及矣又千金方云惡刺取狐屎灰臘月膏和封孔上

灰烏鴉

本草烏鴉平無毒臘月者瓦餅泥煨燒為灰飲下治小兒癩及鬼魅

煨牡蠣

經驗方治一切渴大牡蠣不拘多少於臘月端午日黃泥裹煨通紅收冷取出為末用活鯽魚煎湯調下一錢七小兒服半錢七只兩服差

浴蠶種

集正歷臘日取蠶種籠掛桑中任霜霰雨雪飄凍至立春日收謂之天浴蓋蛾子生有實有妄妄者經寒凍後不復生唯實者生蠶則強健有收成也

造臘燭

瑣碎錄臘日砍竹浸水中一百日取出曝乾搥碎點照光艷如蠟炬

祠公社

禮記月令天子乃祈來年於天宗大割祠於公社及門閭臘先祖五祀注云此周禮所謂蜡祭也

祭先祖

風俗通臘者獵也因獵取獸以祭先祖晉博士張亮議曰臘接也新故交接畋獵大祭以報功

也

報古賢

漢舊儀臘者報鬼神古賢人有功于民者也

祀灶神

搜神記漢宣帝時陰子方者至孝有仁恩嘗臘日晨炊而灶神現形子方再拜受慶家有黃羊剖以祀之暴至巨富子孫職顯後常臘日祀灶勞農夫

後漢禮儀志季冬之月星迴歲終陰陽以交勞

農夫大享臘以送故也

縱吏飲

蔡邕獨斷臘者歲終大祭縱吏民宴飲非迎氣故但送而不迎

遣囚歸

後漢書虞延除細陽令每至歲時伏臘輒休遣囚徒各使歸家並感其恩德應期而還

放囚還

南史何胤仕齊爲建安太守政有恩信人不忍

欺每伏臘放囚還家依期而返

免竊食

後漢書韓卓字子助陳留人臘日奴竊食祭其先人卓義其心卽白免之

恕盜柴

陳留志范喬邑人臘夕盜斫其樹人有告喬佯不聞邑人愧而歸之喬曰卿臘日取此欲與父母相歡娛耳

罷獻兔

憲宗記元和九年十一月戊子罷京兆府獻狐

兔臘日舊獻狐兔

取瘦羊

東觀漢記甄宇北海人建武中青州從事徵拜博士每臘詔賜博士羊人一頭羊有大小肥瘦時博士祭酒議欲殺羊稱分其肉宇曰不可又欲投鈎宇復恥之宇因先自取其最瘦者

發名花

卓異記天授二年臘卿相等詐稱上苑花開請

幸則天許之乃遣使宣詔曰明朝遊上苑火急報春知花須連夜發莫待曉風吹於是凌晨名花瑞草皆發羣臣咸服東坡詩云連夜開此花又云霜枝連夜發

生春草

荆楚歲時記臘鼓鳴春草生

治疥瘡

瑣碎錄臘日空心用蒸餅捲猪板脂食之不生瘡疥久服身體光滑陳日華諸孫年年服之有

效

除瘟病

養生要訣臘月臘夜令人持椒臥井傍無與人言內椒井中可除瘟病

辟疫鬼

淮南子畢萬術臘日埋圓石於宅隅雜以桃弧七枚則無鬼疫

打乾種

鳳臺塵史安陸地宜稻春雨不足則謂之打乾

種蓋人牛種子倍費元符已卯大旱歲暮農夫相告曰來年又打乾矣蓋臘月牛驥泥中則然明年果然

就寺浴

歲時雜記京師士大夫臘日多就僧寺澡浴因飲宴或賦詩不知其所起也

醮天官

正一旨要侯王臘日五帝校定生人處所分野受祿降注三萬六千炁其日可謝罪祈求延年

益壽安定百神移易名位回改名字沐浴先亡
大醮天官合人所求如願求道必獲此日不可
聚會飲樂可清靜經行山林有壇庭之處行道
存念三魂七魄不得經營俗事值臘月臘日是
也

抄離時

燕北雜記臘日戎主帶甲戎裝應番漢臣諸司
使已上並戎裝五更三點坐朝動樂飲酒罷各
等第賜御甲羊馬番呼此節爲抄離時漢人譯

云抄離是戰時是時謂戰時也

交年節

呂原明歲時雜記云十二月二十四日謂之
交年節其事又見東京夢華錄他書未見載
者

醉司命

皇朝東京夢華錄十二月二十四日交年都人
至夜請僧道看經備香茶酒送神燒合家替代
錢紙帖竈馬於竈上以酒糟抹塗灶門謂之醉

司命

誦經呪

歲時雜記舊俗以為七祀及百神每歲十二月二十四日新舊更易皆焚紙幣誦道佛經呪以送故迎新而為禳祈云

照虛耗

歲時雜記交年之夜門及床下以至圍溷皆燃燈除夜亦然謂之照虛耗

掃屋宇

歲時雜記唯交年日掃屋宇無忌不擇吉諺云交年日掃屋不生塵埃

賣備用

東京夢華錄交年日已後京師市井皆買門神鍾馗桃符桃板及財門鈍驢回頭鹿馬天行帖子賣乾茄瓠馬牙菜膠牙錫之類以備除夜之用晁無咎詞云殘臘初雪霽梅白飄香藥依前又還是迎春時候大家都備竈馬門神酒酌除酥桃符盡書吉利五更催驅儺爆竹起虛耗都

教退交年換新歲長保身榮貴願與兒孫盡老
今生祝壽遐昌年年共同守歲

歲時廣記卷第三十九

歲時廣記卷第四十

廣寒僊裔陳

元靚

編

歲除

禮記月令曰是月也日窮於次月窮於紀星
廻于天數將幾終歲且更始是爲歲之終也
文選云歲季月除大蜡始節故曰歲除又曰
除日除夕除夜

有司儼

論語疏儼逐疫鬼也爲陰陽之氣不節癘鬼隨

而作禍故天子使方相氏黃金爲四目熊皮爲帽作儺儺之聲以驅疫鬼一年三遍爲之故月令季春命國儺季秋天子乃儺季冬命有司大儺旁磔注云此月有癘鬼將隨強陰出害人故旁磔於四方之門磔禳也東坡和子由除日見寄云府卒來驅儺矍鑠驚遠客愁來豈有魔煩汝爲禳磔

鄉人儺

論語鄉黨鄉人儺朝服而立于阼階晦庵注云儺所以逐疫周禮方相氏掌之儺雖古禮而近于戲亦必朝服而臨之者無所不用其誠敬也或曰恐其驚先祖五祀之神欲其依已而安也

逐除儺

呂氏春秋季冬紀注曰前歲一日擊鼓驅疫癘之鬼謂之逐除亦曰儺李綽秦中歲時記云歲除日儺皆作鬼神狀二老人名爲儺翁儺母東坡詩云爆竹驚隣鬼驅儺聚小兒又古詞云萬戶與千門驅儺鼎沸

驅鬼儺

禮緯云高陽氏有三子生而亡去爲疫鬼一居江水是爲瘧一居若水爲罔兩蜮鬼一居人宮室區隅中善驚人小兒於是以正歲十二月命禮官時儺以索室中而驅疫鬼也月令章句曰日行北方之宿北方大陰恐爲所抑故命有司大儺所以扶陽抑陰也韓文公詩云屑屑水帝魂謝謝無餘輝如何不肖子尙奮瘧鬼威又張衡東京賦云卒歲大儺驅除羣癘注云儺逐疫

癘也歲終之日謂之清涼室

埋祟儺

皇朝東京夢華錄除日禁中呈大儺儀並用皇城親事官諸班直戴假面繡畫色衣執金鎗龍旗教坊使孟景初身品魁偉環全副金鍍銅甲裝將軍用鎮殿將軍二人並介冑裝門神教坊南河炭醜惡魁肥作判官又裝鍾馗小妹土地灶神之類共千餘人自禁中驅祟出南薰門外轉龍灣謂之埋祟而罷

送疫儺

後漢禮儀志先臘一日大儺謂之逐疫其儀選中黃門子弟十歲以上十二以下百二十人爲儺子皆赤幘皂製執大鼗方相氏黃金四目蒙熊皮玄衣朱裳執戈揚盾作十二獸裳衣毛角中黃門行人冗從僕射將之以逐惡鬼于禁中夜漏上水朝臣會侍中尙書御史謁者虎賁羽林郎將執事皆赤幘陞衛乘輿御前殿黃門令奏曰儺子備請逐疫於是中黃門倡儺子和曰

甲作食殍腓胃食虎雄伯食魅騰簡食不祥攬諸食咎伯奇食夢強梁祖明共食磔死寄生委隨食觀錯斷食巨窮奇騰根共食蠱凡使十二神追惡凶赫女軀拉女幹節解女肉抽女肺腸女不急去後者爲糧因作方相與十二獸舞嚙呼周徧前後省三過持炬火送疫出端門門外騶騎傳炬出宮司馬闕門門外五營騎士傳火棄雒水中東京賦曰煌火馳而星流逐赤疫於四裔注云衛士千人在端門外五營千騎在衛

士外爲三部更送至雒水凡三輩逐鬼投雒水中仍上天池絕其橋梁使不復渡還

殿前儺

樂府雜錄驅儺用方相氏四人戴冠及面具黃金爲四目衣熊裘執戈揚盾口作儺儺之聲以逐除也侷子五百小兒爲之朱褶青襦面具晦日於紫宸殿前儺張宮懸樂

大內儺

南部新書歲除日太常卿領官屬樂吏護童侷

子千人晚入內至夜於寢殿前儺燃蠟具燎沉檀熒煌如晝上與親王妃子以下觀之其夕賞賜最厚王建宮詞云金吾除夜進儺名畫袴朱衣四隊行院院燒燈如白日沉香火底坐吹笙

夢鍾馗

唐逸史明皇開元講武驪山翠華還宮上不悅因疴疾作晝寢夢一小兒衣絳犢鼻跣一足履一足腰懸一履搢一筠扇盜太真綉香囊及上玉笛遶殿奔戲上前上叱問之小鬼奏曰臣乃

虛耗也上曰未聞虛耗之名小鬼奏曰虛者望
空虛中盜人物如戲耗卽耗人家喜事成憂上
欲怒呼武士俄見一大鬼頂破帽衣藍袍繫角
帶鞞朝靴徑捉小鬼先剗其目然後孽而啖之
上問大者爾何人也奏云臣終南山進士鍾馗
也因武德年中應舉不捷羞歸故里觸殿階而
死是時奉旨賜綠袍以葬之感恩發誓與我王
除天下虛耗妖孽之事言訖夢覺疴疾頓瘳乃
詔畫工吳道子曰試與朕如夢圖之道子奉旨

恍若有睹立筆圖就進呈上視久之撫几曰是
卿與朕同夢爾賜以百金

畫鍾馗

野人閑話昔吳道子所畫一鍾馗衣藍衫鞞一
足眇一目腰一笏巾裹而蓬髯垂髮左手捉一
鬼以右手第二指捩鬼眼睛筆迹遵勁實有唐
之神妙收得者將獻僞蜀主甚愛之常懸於內
寢一日召黃筌令看之一見稱其絕妙謝恩訖
昶謂曰此鍾馗若拊指搯鬼眼睛則更較有力

試爲我改之筮請歸私第數日看之不足別張
絹素畫一鍾馗以拇指搯鬼眼睛并吳本併進
納訖昶問曰比令卿改之何爲別畫筮曰吳道
子所畫鍾馗一身之力氣色眼貌俱在第二指
不在拇指所以不敢輒改筮今所畫雖不及古
人而一身之力氣思併在拇指昶甚悅賞筮之
能遂以綵緞銀器旌其別識

賜鍾馗

歲時雜記舊傳唐明皇不豫夢鬼物其名曰鍾

馗旣寤遂安令家家圖畫其形象於門壁禁中
每歲前賜二府各一幀又或作鍾馗小妹之形
皆爲捕魍魎之狀或役使鬼物又云鍾馗門神
桃符桃板諸物皆候家祭畢設之恐驚祖先也

原鍾馗

筆談今人歲首設鍾馗辟邪不知起自何代
皇祐中金陵發一塚得碑乃宋宗慤母鄭夫人
墓志載有妹名鍾馗乃知鍾馗之設遠矣

辨鍾馗

遜齊閑覽北史堯暄本名鍾葵字辟邪生於魏道武時人有于勁者亦字鍾馗以世數考之暄又居前則知不特起於宋也然馗與葵二字不同必傳寫之有誤也

寫桃符

古今詩話偽蜀每歲除日諸宮門各給桃符書元亨利貞四字時昶子善書札取本宮策勲府桃符書云天垂餘慶地接長春乾德中伐蜀明年蜀降二月以兵部侍郎呂餘慶知軍府事以

策勲府爲治所 太祖聖節號長春此天垂地接之兆又楊文公談苑云辛寅遜仕偽蜀孟昶爲學士王師將攻伐之前歲昶令學士作兩句寫桃符寅遜題曰新年納餘慶嘉節號長春明年蜀亡呂餘慶以參知政事知益州長春乃太祖誕聖節名也

戲藏鈞

荆楚歲時記歲前又爲藏鈞之戲辛氏三秦記曰始於鈞弋夫人按鈞弋夫人姓趙爲漢武帝

婕妤生昭帝漢武故事云上巡狩河間見青氣
自地屬天望氣者云下有貴子上求之見一女
子在空室中姿色殊絕兩手皆拳數百人擘之
莫舒上自披卽舒號拳夫人卽鈎弋也後人見
其手拳而有國色故因之而爲藏鈎之戲李商
隱詩云楚妃交薦枕漢后共藏鬪周美成除夜
立春云裁幡小廢藏鈎戲生菜仍口宿歲口

爲藏彊

風土記臘日以後叟媪各隨其儕爲藏彊分爲
二曹以較勝負司馬溫公詩云藏鬪新度臘習
舞競裁衣又藏彊詩云不知藏在何人手卻向
尊前鬪弄拳鬪彊鈎並居侯切三字皆有理原
其所本則鈎字爲勝

設火山

紀聞唐貞觀初天下乂安百姓富贍時屬除夜
太宗盛飾宮掖明設燈燭殿內諸房莫不綺麗
盛奏歌樂乃延蕭后觀之樂闋帝謂蕭后曰朕
施設孰愈隋主蕭后笑而答曰彼乃亡國之君

陛下開基之主奢儉之事固不同年帝曰隋主何如蕭后曰隋主享國十有餘年妾常侍從見其淫侈每二除夜殿前諸院設火山數十盡沉香木根也每夜山皆焚沉香數車火光暗則以甲煎沃之焰起數丈沉香甲煎之香傍聞數十里一夜之中用沉香二百餘乘甲煎過二百石歐陽公詩云隋宮守夜沉香火楚俗驅神爆竹聲又李易安元旦詞云瑞腦煙殘沉香火冷

懸寶珠

續世說云隋主每二除夜殿內房中不燃膏火中懸珠一百二十以照之光比白日盡明月寶夜光珠也大者六七寸小者猶三寸一珠之價直數千萬也干寶搜神記云隋侯嘗見大蛇被傷而救之後含珠以報其珠徑寸純白夜有光明如月之照一堂隋侯珠一名明月珠杜甫詩云自得隋珠覺夜明

燎爆竹

李旼該聞集爆竹辟妖隣人有仲叟家爲山魃

所崇擲瓦石開戶牖不自安叟求禱之以佛經
報謝而妖祟彌盛叟謂叟曰公且夜於庭落中
若除夕爆竹數十竿叟然其言爆竹至曉寂然
安帖遂止

照水燈

金門歲節洛陽人家除夜則以銅刀刻門埋小
兒硯點水盆燈

添商陸

提要錄裴度除夜嘆老殆曉不寐戶中商陸火

凡數添也

作蕢燭

歲時雜記除夕作蕢燭以麻糝濃油如庭燎守
倅監司廳皆公庫供之冬除夜亦然

燒骨醢

歲華紀麗除夜燒骨醢爲照庭助陽氣又四時
纂要云除夜積柴于庭燎火辟灾

燃皂角

歲時雜記除夜空房中集眾燃皂角令烟不出

眼淚出爲限亦辟疫氣

焚廢藥

歲時雜記除日集家中不用之藥焚之中庭以辟瘟疫之氣

埋大石

荆楚歲時記十二月暮日掘宅四角各埋一大石爲鎮宅又鴻寶畢萬術云埋圓石於宅四隅搥桃核七枚則鬼無能殃也

賣白餠

歲時雜記膠牙餠形製不一其甚華者云膠之使齒牢東京潘樓下從歲前賣此等物至除夜殆不通車馬

投豆麥

龍魚河圖歲暮夕五更取二七豆麥子家人髮少許同著井中呪勅井使其家竟年不遭傷寒辟五方疫鬼一云用麻子小豆各二七粒

臥井傍

養生論歲暮令人持椒臥于井傍候夜靜內椒

井中以壓邪氣也

爲面具

歲時雜記除日作面具或作鬼神或作兒女形或施于門楣驅讎者以蔽其面或小兒以爲戲

動鼓樂

歲時雜記冬至歲旦前一夜大作鼓樂于宿倅廳自初夜至五鼓其聲不絕

宜嫁娶

瑣碎錄北方人嫁娶只歲除日牛羊入圈時入

宅

祭詩章

金門歲節賈島常以歲除取一年所得詩祭以酒食曰勞吾精神以是補之

添聰明

瑣碎錄北人年夜五更以葱擊小兒頭謂之添聰明

作鍛磨

僧圓逸記都下寺院每用歲除鍛磨是日作鍛

磨齋

修齋戒

四時纂要十二月晦日前兩日通晦三日齋戒
燒香靜念仙家重之

宜整攝

歲時雜記僧家以臘月三十日譬臨終一念不
可不整攝也

示大眾

松菴語錄長沙北禪賢和尚歲除示眾云今夜

無可供養大眾待烹箇露地白牛與諸人分歲
舉猶未了有僧出云今官中追呼和尚不合私
剝耕牛兼索皮角賢將下頭袖僧拾取歸眾松
菴云此禪可謂孝順翻成骨董含飯還覺面腫
一物未到口邊先被傍人啣儂

參吉辰

歲時雜記世俗以歲除爲亂歲百無所忌冠婚
沐浴皆用此日然於陰陽家都無所出須參取
吉辰用之

忌短日

陰陽書癸亥日爲日短晦日爲月短除日爲年短最不宜用事謂之三短日

浴殘年

歲時雜記在京寺觀以除日多燂湯饌食以召賓客謂之浴殘年

計有餘

歲時雜記凡治已治人至除日當自觀察以計歲之有餘

餽晚歲

東坡文歲晚相與餽問爲餽歲酒食相呼爲別歲至除夜達旦不寐爲守歲蜀之風俗如是子瞻作記歲暮鄉俗三首其一餽歲其二別歲其三守歲子由亦次韻焉

祝長命

歲時雜記癡兒騃女多達旦不寐俗語云守冬爺長命守歲娘長命

守歲夜

皇朝東京夢華錄除夜禁中爆竹山呼聲聞於
外士庶之家圍爐團坐達旦不寐謂之守歲又
有宵夜果子古詞云獸炭共圍通宵不寐守盡
殘更待春至

迎新年

荆楚歲時記歲暮家家具餽菽謂宿歲之儲以
迎新年相聚酣飲留宿歲飯至新年則弃之街
衢以爲去故納新也唐太宗守歲詩云暮景斜
芳殿年華綺麗宮寒辭去冬雪暖帶入春風階

馥舒梅素盤花卷燭紅共懽新故歲迎送一宵
中又除日太原召侍臣賜宴守歲詩云四時運
灰瑄一夕變冬春送寒餘雪盡迎歲早梅新

歲時廣記卷第四十

歲時廣記末卷

廣寒仙裔陳

元靚

編

總裁

寅午戌月

坦庵拜命歷今人不用正五九月訪彼名流稊

諸故實皆無所據愚常論之正五九月斗建寅

午戌屬火臣為商商為金火能制金是以忌之

本朝以火德王天下火生在寅旺在午墓在戌
應公家事並作商音商屬金敗于午衰于戌絕
于寅以絕敗衰耗之金豈敢犯生旺墓金之火
又况君臣自有定分故不用也彈冠必用亦以



此三月壇經云正月上旬與九月下旬吉往賢
爲元月本旨以正月上旬火力猶微九月下旬火力已
減故不曰凶或得吉日時辰此不足執惟金曹
避之尤緊

正五九月

容齋隨筆釋氏一說正五九月天帝釋以大寶
鏡輪照四天下寅午戌月正臨南贍部洲故奉
佛者皆茹素以徼福官司謂之斷月故受驛券
有所謂羊肉者則不支俗謂之惡月士大夫赴

官者輒避之或謂唐日藩鎮蒞事必大享軍屠
殺羊豕至多故不欲以其月上事今之他官不
當爾然此說亦無所經見予讀晉書禮志穆帝
納后欲用九月九月是忌月北齊書云高洋謀
篡魏其臣宋景業言宜以仲夏受禪或曰五日
不可入官犯之終於其位景業曰王爲天子無
復下期豈得不終於其位乎乃知此忌相承由
來久矣竟不能曉其義及出何經典也

避三長月

藝苑雌黃唐武德二年正月詔自今正月五月九月不行死刑禁屠殺予嘗考之此蓋本於浮屠氏之教所謂年三長齋是也釋氏智論云天帝釋以大寶鏡照四大神州每月一移察人善惡正五九月照南贍部洲故以此月省刑修善斷獄律諸立春以後秋分以前決死刑者徒一年其所犯雖不待時若於斷屠月及禁殺日而決者各杖六十疏議云斷屠月謂正月五月九月蓋唐時始以此著之令式正五九月斷屠卽

有閏月各同正月亦不得奏決死刑今人泥此名三長月如之官赴任之類一切皆避是月未知此何理也

用前半月

瑣碎錄京師貴家用事多在上旬門戶吉慶和合興旺逐月初五日月生魄幹事隨天地之氣請賓客和合多在月半之前若月望後氣候漸弱全不中用 朝廷拜相亦用上旬

五不祥日

遯齋閑覽每月初四日初七日十六日十九日
爲四不祥日林復之言上官用此日鮮有善罷
屈指凡八九人如此又方君云初四日辰雖佳
亦不可上官若更值丁日尤不佳有親必憂去
又法有增二十八日謂五不祥大忌上官其日
雖不犯兀縱得吉辰亦不宜用歐陽參政記事
云犯此日者多不終任應上官嫁娶必參差沈
存中筆談云常歷數親知犯此日皆不得善脫

十惡大敗

提要錄日之十惡大敗自古名之舊矣今佛書
大藏元黃經中所謂十惡大敗始與常之所謂
不同迺以甲巳年三月戊戌日七月己亥日十
月丙申日十一月丁酉日乙庚年四月壬申日
九月乙未日丙辛年三月辛未日九月庚辰日
十月甲辰日戊癸年六月己丑日除丁壬年中
無日外前之八年內遇此十日者乃十惡大敗
日用之百事不宜切須避忌

諸家兀日

遯齋閑覽仕宦多忌元日不赴官人多不曉其義或云瓦日然元日數家之說不同最爲無據彈冠必用所載有年元月元日元時元大元小元上元下元又有大小月元法逐月上下元法六輪元別法傳神經元法百忌歷元法通仙六局元法演星禽元法並詳見上官拜命玉歷然今之士夫信用與萬年口口歷所載乃六輪經上下元日法其上起正月陰年巽上起正月並順行月上便起初一若逢閏月則於本月上起

初一只數六位震兌二宮不數遇巽爲上元遇坤爲下元蓋元者元隍不安也瓦者謂瓦解離散也

正誤時日

三歷撮要十惡日甲辰乙巳與壬申丙申丁酉及庚辰戌戌巳亥加辛巳己丑都來十位神然則甲寅旬無十惡日蓋丁亥誤作丁酉癸巳誤作巳亥也又貴人時日甲戌庚牛羊乙巳鼠猴鄉丙丁猪雞位壬癸兔蛇藏六辛逢馬虎此是

貴人鄉何甲戌庚三位皆牛羊而辛獨逢馬虎亦世傳訛耳或以爲甲戌見牛羊而辛獨逢馬識者鑒諸

甲子占雨

朝野僉載春雨甲子赤地千里夏雨甲子乘船入市秋雨甲子禾頭生耳冬雨甲子飛雪萬里一云雙日甲子□□少應唐俚語云禾頭生耳蓋禾粟無生耳者禾頭□□□□是也杜甫詩云禾頭生耳黍穗黑

甲申占雨

占書凡甲申雨五穀貴大雨大貴小雨小貴若溝瀆漲滿急聚五穀甲申至己丑風雨糴貴主六十日

庚寅占雨

占書凡庚寅至癸巳風雨皆主糴折以入地五寸爲候五月爲麥六月爲黍七月爲粟八月爲菽麥九月爲穀皆以此則之假令五月雨庚寅卽麥折錢他月倣此

甲寅占雨

占書春三月雨甲寅乙卯夏穀貴一倍夏雨丙寅丁卯秋穀貴一倍秋雨庚寅辛卯冬穀貴一倍冬雨壬寅癸卯春穀貴一倍

沐浴避忌

西山記沐旬浴五夫五則五氣流傳浴之榮衛通暢旬則數滿復還真氣在腦沐之則耳目聰明若頻浴者血凝而氣散雖肌體光澤久而損氣能成癱瘓之疾者氣不勝血神不勝形也若

頻沐者氣壅于腦滯于中令人體重形疲久而經絡不能通暢老君實錄云誦加句天童經呪水沐浴百病皆愈

房室避忌

修真秘訣四時八節弦望晦朔本命之日魁罡值日六甲日六丁日甲子日庚申日子卯日為天地交會之辰特忌會合違者減年奪算又庚申論云五月五日六日七日十五日十六日十七日廿五日廿六日廿七日為九毒日切宜齋

戒尤忌色慾犯之減壽一云是日宜別寢犯之三年致卒

早暮謹戒

黃帝雜忌一日之忌暮無飽食一月之忌暮無大醉一歲之忌暮無遠行終身之忌暮無燃燭行房又仙經云一日之忌暮無飽食一月之忌暮無遠行終身之忌暮常護氣又道林曰晦日不歌朔日不哭

鞮鞞應時

馬癡記王武子好馬非馬不行正旦則柳葉金障泥上元則滿月鞮清明則剪水鞭重午則籠嬌鞞八月中秋則玉滿琤絡頭重陽則蟬兒鞞春秋社則塗金鞞冬至則嘶風鞞除日則藥玉鞞每節日則餵馬以明砂豆薔薇草

北人打圍

使遼錄北人打圍一歲間各有所處正月釣魚海上於水底釣大魚二月三月放鶻號海東青打雁四月五月打麋鹿六月七月於涼處坐夏

八月九月打虎豹之類自此直至歲終如南人趁時耕種也

龜茲戲樂

西陽雜俎龜茲元日鬪羊馬馳爲戲七日觀勝負以占一年羊馬減耗繁息也婆邏遮並服狗頭猴面男女無晝夜歌舞八月十五日行像及透索爲戲焉耆元日二月八日婆摩遮三日野祀四月十五日遊林五月五日彌勒下生七月七日祀先祖九月九日牀撒十月十日王爲厭

法王出首領家首領騎王馬一日一夜處分王事十月十四日每日作樂至歲窮拔汗那十二月十九日王及首領分爲兩朋各出一人着甲眾人執瓦石棒杖東西互擊甲人先死卽止以占當年豐儉

